

ФИСКАЛ ИНСТИТУТ



**Мавзу: Жисмоний шахслардан олинадиган мол-мулк ва ер солиқлари
маъмурчилиги (солиқ элементлари асосида)**

Марузачи: катта ўқитувчи Ф.Рузиев

Тошкент - 2023 йил

Мавзу: Жисмоний шахслардан олинадиган мол-мулк ва ер солиқлари маъмурчилиги (солиқ элементлари асосида)

Режа:

1.Жисмоний шахслардан олинадиган мол-мулк солиғи

1.1. Мол-мулк солиғи тўловчи жисмоний шахслар, солиқ объектлари ва базаси

1.2. Мол-мулк солиғи ставкалари ва солиқ имтиёзлари ҳамда уларни қўллаш хусусиятлари

1.3. Жисмоний шахслар учун мол-мулк солигни ҳисоблаб чиқариш ва бюджетга тўлаш тартиби

2.Жисмоний шахслардан олинадиган ер солиғи

2.1. Ер солиғи тўловчи жисмоний шахслар, солиқ обьекти ва солиқ базаси

2.2. Ер солиғи ставкалари, солиқ ставкаларини аниқ миқдорларини белгилаш ҳамда ер солиғи бўйича имтиёзларни қўллаш хусусиятлари

2.3. Жисмоний шахслар учун ер солигини ҳисоблаб чиқариш ва бюджетга тўлашнинг ўзига хос жиҳатлари

Таянч сўз ва иборалар

Туар жой, нотуар жой, уй-жойлар, квартиралар, дала ҳовли иморатлари, бино, иншоат, ёрдамчи-хўжалик иморатлари, мол-мулк солиғи, якка тартибда уй-жой куриш учун берилган ер участкалари, дехқон хўжалигини юритиш учун берилган ер участкалари, ер солиғи, ижара тўлови, ставка, базавий ставка, зона, имтиёз, коэффициент, тўлов муддати.

1.Жисмоний шахслардан олинадиган мол-мулк солиғи

1.1. Мол-мулк солиғи тўловчи жисмоний шахслар, солиқ обьектлари ва базаси

Ўзбекистон Республикасининг Солиқ кодексига мувофиқ мулкида солиқ солиш обьекти деб тан олинадиган мол-мулки бўлган жисмоний шахслар, шу жумладан чет эл фуқаролари, агар Ўзбекистон Республикасининг халқаро шартномаларида бошқача қоида назарда тутилмаган бўлса, шунингдек юридик шахс ташкил этган ҳолдаги ёки этмаган ҳолдаги дехқон хўжаликлари жисмоний шахслардан олинадиган мол-мулк солигининг *солиқ тўловчилари* деб эътироф этилади.

Агар мол-мулк мулкдорининг жойлашган ерини аниқлаш имкони бўлмаса, шунингдек қўчмас мулк мулкдори вафот этган тақдирда, бу мулк қайси шахснинг эгалигига ва (ёки) фойдаланишида бўлса, ўша шахс *солиқ тўловчи* деб эътироф этилади.

Ўзбекистон Республикасининг Солиқ кодексининг 419-моддасига асосан Ўзбекистон Республикаси ҳудудида жойлашган қуйидаги мол-мулк жисмоний шахслардан олинадиган мол-мулк солигининг *солиқ солиши обьекти* ҳисобланади:

- 1) уй-жойлар, квартиралар, дала ҳовли иморатлари;

2) тадбиркорлик фаолияти ва (ёки) даромад олиш учун мўлжалланган яшаш учун мўлжалланмаган кўчмас мулк объектлари;

3) қурилиши тугалланмаган яшаш учун мўлжалланмаган объектлар.

Қурилиши тугалланмаган яшаш учун мўлжалланмаган объектларга ушбу объектни қуришга доир лойиҳа-смета хужжатларида белгиланган норматив муддатда қурилиши тугалланмаган объектлар, агар қурилишнинг норматив муддати белгиланмаган бўлса, ушбу объектнинг қурилишига ваколатли бўлган органнинг рухсатномаси олинган ойдан эътиборан йигирма тўрт ой ичида қурилиши тугалланмаган объектлар киради.;

4) кўп квартирали уйларга узвий боғлиқ бўлган автомашина туар жойлари, шунингдек бошқа иморатлар, бинолар ва иншоотлар.

Кўчмас мулкка бўлган ҳукуқларни давлат рўйхатидан ўтказувчи орган томонидан белгиланадиган солиқ солиш объектларининг кадастр қиймати солиқ базаси ҳисобланади. Солиқни ҳисоблаб чиқариш мақсадида солиқ базаси қирқ икки миллион сўмдан кам бўлиши мумкин эмас.

Жисмоний шахсларнинг мол-мулкини баҳолаш бўйича ваколатли орган томонидан аниқланган солиқ солиш объективининг баҳоси мавжуд бўлмаган тақдирда, мол-мулкнинг шартли қиймати Тошкент ва Нукус шаҳарларида, шунингдек вилоят марказларида қирқ икки миллион сумнинг беш баравари миқдорида, бошқа шаҳарларда ва қишлоқ жойларда эса қирқ икки миллион сўмнинг икки баравари миқдорида солиқ базаси ҳисобланади.

Битта жисмоний шахс бир нечта солиқ солиш объекти бўйича солиқ тўловчи бўлган тақдирда, **солиқ базаси ҳар бир объект бўйича алоҳида ҳисоблаб чиқилади**.

1.2. Мол-мулк солиғи ставкалари ва солиқ имтиёzlари ҳамда уларни қўллаш хусусиятлари

Жисмоний шахслардан олинадиган мол-мулк солиғи ставкалари солиқ солиш объектларининг кадастр қийматига нисбатан, шунингдек айrim ҳолларда солиқ солиш объекти тури (туар ёки нотуар), жойлашган жойи, умумий майдонини ҳам ҳисобга олинган ҳолда Солиқ кодексининг 422-моддасида белгилаб қўйилган.

Жумладан, солиқ ставкалари қуидаги миқдорларда белгиланади:

T/p	Солиқ солиш объектлари	Солиқ ставкалари, %
1.	Уй-жойлар ва квартиralар, дала ҳовли иморатлари (бундан умумий майдони 200 кв.м дан ортиқ бўлганлари мустасно), кўп квартирали уйларга узвий боғлиқ бўлган автомашина туар жойлари, шунингдек бошқа иморатлар, бинолар ва иншоотлар	0,28
2.	Шаҳарларда жойлашган уй-жойлар ва квартиralар, умумий майдони:	
	200 кв.м дан ва 500 кв.м га қадар бўлганлари	0,37
	500 кв.м дан ортиқ бўлганлари	0,49
3.	Бошқа аҳоли пунктларида жойлашган, умумий майдони 200 кв.м дан ортиқ бўлган уй-жойлар ва квартиralар, дала ҳовли иморатлари	0,37
4.	Тадбиркорлик фаолияти учун ёхуд юридик шахсга ёки якка тартибдаги тадбиркорга ижарага беришда фойдаланиладиган солиқ	1,5

солиш объектлари, шунингдек тадбиркорлик фаолияти ва (ёки) даромад олиш учун мўлжалланган, яшаш учун мўлжалланмаган кўчмас мулк объектлари

Кўчмас мулкка бўлган ҳуқуқларни давлат рўйхатидан ўтказишни амалга оширувчи органлар томонидан рўйхатга олинмаган янги қурилган уйжойларга нисбатан солиқ ставкаси кўчмас мулкка бўлган ҳуқуқларни давлат рўйхатидан ўтказишни амалга оширувчи органлар томонидан тақдим этилган ахборот асосида мулкнинг шартли қийматига нисбатан икки баравар миқдорида кўлланилади.

Худудларнинг ва фаолият амалга ошириладиган жойларнинг хусусиятларини ҳисобга олган ҳолда Қорақалпоғистон Республикаси Жўқорғи Кенгеси, халқ депутатлари, вилоятлар ва Тошкент шаҳар Кенгашлари ўрнатилган солиқ ставкаларига 0,7 дан 1,3 гача бўлган оралиқдаги камайтирувчи ва оширувчи коэффициентлар белгилашга ҳақли.

Ўзбекистон Республикасининг Солиқ кодекси 480¹-моддасида маҳсус солиқ ставкалари қўлланилишини назарда тутувчи солиқ солишининг алоҳида тартиби қўлланиладиган Ўзбекистон Республикасининг алоҳида худудлари: Фарғона вилоятининг -Сўх тумани; - Риштон туманининг Чўнғара маҳалласи; Фарғона туманининг Шоҳимардон, Ёрдон маҳаллалари ва Ҳосилот маҳалласининг Тоштепа - 2 кўчаси худудларида жойлашган кўчмас мулк объектларига Солиқ кодексининг 422-моддасида белгиланган мол-мулк солиги ставкаларига 0,1 коэффициент қўлланилади.

Жисмоний шахс ёки оиласи корхона турар жойдан унда истиқомат қилиш билан бир вақтда товарлар ишлаб чиқариш (хизматлар кўрсатиш) учун фойдаланган тақдирда, солиқ яшаш учун мўлжалланган жойлар учун белгиланган солиқ ставкалари бўйича тўланади.

Норматив муддатда қурилиши тугалланмаган яшаш учун мўлжалланмаган объектларга нисбатан солиқ ставкаси 3 фоиз миқдорида белгиланади.

Солиқ кодексининг 421-моддасига асосан қўйидагиларнинг мулкида бўлган мол-мулк солиқ солищдан озод этилади:

1) «Ўзбекистон Қаҳрамони», Совет Иттифоқи Қаҳрамони, Меҳнат Қаҳрамони унвонларига сазовор бўлган, учала даражадаги Шуҳрат ордени билан тақдирланган фуқароларнинг.

Мазкур имтиёз тегишинча «Ўзбекистон Қаҳрамони» унвони берилганлиги тўғрисидаги гувоҳнома, Совет Иттифоқи Қаҳрамони, Меҳнат Қаҳрамони дафтарчалари, орден дафтарчаси ёки мудофаа ишлари бўйича бўлимнинг маълумотномаси асосида берилади;

2) уруш ногиронлари ва қатнашчилари, шунингдек доираси қонунчилик билан белгиланадиган, уларга тенглаштирилган шахслар.

Ушбу имтиёз уруш ногиронининг (қатнашчисининг) тегишли гувоҳномаси ёки мудофаа ишлари бўйича бўлимнинг ёхуд бошқа ваколатли органнинг маълумотномаси асосида, ногиронлиги бўлган бошқа шахсларга (қатнашчиларга) ногиронлиги бўлган шахснинг (қатнашчининг) имтиёзларга бўлган ҳуқуки тўғрисидаги гувоҳномаси асосида берилади.

3) собиқ СССРни, Ўзбекистон Республикасининг конституциявий тузумини ҳимоя қилиш ёхуд ҳарбий хизматнинг ёки ички ишлар органларидағи ва Ўзбекистон Республикаси Миллий гвардиясидаги хизматнинг бошқа мажбуриятларини бажариш чоғида яраланганлиги, контузия ёки майиб бўлганлиги оқибатида ёхуд фронтда бўлиш билан боғлиқ касаллик туфайли ҳалок бўлган ҳарбий хизматчиларнинг ҳамда ички ишлар органлари ва Ўзбекистон Республикаси Миллий гвардияси ходимларининг ота-оналари ҳамда бева хотинлари (бева эрлари).

Ушбу имтиёз «Ҳалок бўлган аскарнинг бева хотини (бева эри, онаси, отаси)» ёки «Ички ишлар органлари ҳалок бўлган ходимининг бева хотини (бева эри, онаси, отаси)», «Ўзбекистон Республикаси Миллий гвардияси ҳалок бўлган ходимининг бева хотини (бева эри, онаси, отаси)» штампи қўйилган ёхуд пенсия гувоҳномасини берган муассаса раҳбарининг имзоси ва ушбу муассаса мухри билан тасдиқланган тегишли ёзувли пенсия гувоҳномаси асосида берилади.

Агар мазкур шахслар пенсионер бўлмаса, солиқ имтиёзи уларга собиқ СССР Мудофаа вазирлиги, Давлат хавфсизлик қўмитаси ёки Ички ишлар вазирлигининг, шунингдек Ўзбекистон Республикаси Мудофаа вазирлиги, Давлат хавфсизлик хизмати, Ички ишлар вазирлиги, Фавқулодда вазиятлар вазирлиги, Ўзбекистон Республикаси Миллий гвардияси, Ўзбекистон Республикаси Президенти Давлат хавфсизлик хизмати, Ўзбекистон Республикаси Давлат божхона қўмитасининг тегишли органлари ва ҳарбий хизмат назарда тутилган бошқа идоралар томонидан берилган ҳарбий хизматчининг ёки ички ишлар органлари ва Ўзбекистон Республикаси Миллий гвардияси ходимининг ҳалок бўлганлиги тўғрисидаги маълумотнома асосида берилади.

Тегишинча собиқ СССРни, Ўзбекистон Республикасининг конституциявий тузумини ҳимоя қилиш ёки ҳарбий хизматнинг ёхуд ички ишлар органларидағи ва Ўзбекистон Республикаси Миллий гвардиясидаги хизматнинг бошқа мажбуриятларини бажариш чоғида ёхуд фронтда бўлиш билан боғлиқ касаллик туфайли ҳалок бўлган ҳарбий хизматчиларнинг ёки ички ишлар органлари ва Ўзбекистон Республикаси Миллий гвардияси ходимларининг бева хотинларига (бева эрларига) солиқ имтиёзи факат улар янги никоҳдан ўтмаган тақдирда берилади.

4) энергия ресурсларининг амалдаги тармоқларидан тўлиқ узиб қўйилган турар жойларда қайта тикланадиган энергия манбаларидан фойдаланувчи шахслар қайта тикланадиган энергия манбалари ўрнатилган ойдан эътиборан уч йил муддатга;

Мазкур имтиёз энергия ресурсларининг амалдаги тармоқларидан тўлиқ узиб қўйилган ҳолда қайта тикланадиган энергия манбаларидан фойдаланиш тўғрисида энергия таъминоти ташкилотлари томонидан берилган маълумотнома асосида тақдим этилади.

5) етим болалар ва ота-она қарамоғидан маҳрум бўлган болалар. Мазкур имтиёз етим болаларга ва ота-она қарамоғидан маҳрум бўлган болаларга

давлат томонидан ажратиладиган уй-жой учун улар йигирма уч ёшга тўлгунига қадар амал қиласи.

Кўйидаги жисмоний шахсларнинг мулкида бўлган мол-мулк олтмиш квадрат метр доирасида солиқ солишдан озод қилинади:

1) ўн нафар ва ундан ортиқ болалари бор ота-оналаридан бирининг. Мазкур имтиёз фуқароларнинг ўзини ўзи бошқариш органининг болалар борлигини тасдиқловчи маълумотномаси асосида берилади;

2) пенсионерларнинг. Мазкур имтиёз пенсия гувоҳномаси асосида берилади;

3) I ва II гурӯҳ ногиронлиги бўлган шахсларнинг. Мазкур имтиёз пенсия гувоҳномаси ёки тиббий-меҳнат эксперт комиссиясининг маълумотномаси асосида берилади;

Мазкур солиқ имтиёзларига эга бўлган шахслар солиқ имтиёзини олишга бўлган хуқуқини тасдиқловчи хужжатларни солиқ солиш обьекти жойлашган ердаги солиқ органларига мустақил равишда тақдим этади.

Солиқ кодексининг 421-моддасида белгиланган солиқ имтиёзлари мулкдорнинг танловига кўра фақат битта яшаш учун мўлжалланган кўчмас мулк обьектига татбиқ этилади, бундан энергия ресурсларининг амалдаги тармоқларидан тўлиқ узуб қўйилган тураг жойларда қайта тикланадиган энергия манбаларидан фойдаланувчи шахслар мустасно.

2023 ЙИЛ 16 ФЕВРАЛДАГИ ПҚ-57-СОН ҚАРОРИ БИЛАН:

2023 йил 1 апрелдан бошлиб умумий қуввати 100 кВтгача бўлган қайта тикланувчи энергия манбалари қурилмаларини ўрнатган жисмоний шахслар ушибу қурилмалар бўйича мол-мулк солигини тўлашдан улар фойдаланишига топширилган пайтдан эътиборан уч **йил муддатга**, ўрнатилаётган қуёш панелларининг қувватига нисбатан 25 фоиздан кам бўлмаган қувватга эга электр энергиясини сақлаши тизими билан ўрнатилган бўлса — **ўн йил муддатга** озод этилади.

Ўзбекистон Республикаси Президентининг 2013 йил 4 январдаги ПҚ-1902-сонли қарорига асосан 2020 йил 1 июлгача жисмоний шахслар, қишлоқ жойларда намунавий лойиҳалар бўйича якка тартибдаги уй-жойлар қурилиши Дастури доирасида, ипотека кредитини тўлаб бўлмагунга қадар, харид қилинган уй-жойлар бўйича мулк солигини тўлашдан озод қилинадилар.

1.3. Жисмоний шахслар учун мол-мулк солиғни ҳисоблаб чиқариш ва бюджетга тўлаш тартиби

Солиқни ҳисоблаб чиқариш солиқ тўловчининг яшаш жойидан қатъи назар, солиқ солиш обьекти жойлашган ердаги солиқ органлари томонидан кўчмас мулкка бўлган хуқуқларни давлат рўйхатидан ўтказишни амалга оширувчи органнинг маълумотлари асосида амалга оширилади.

Солиқ суммаси мол-мулкнинг 1 январдаги ҳолатига кўра бўлган кадастр қийматидан ва белгиланган солиқ ставкасидан келиб чиқсан ҳолда ҳисоблаб чиқарилади.

Умумий майдони 200 кв.метргача бўлган туар жойлар учун
мол-мулк солигини ҳисоблаш тартиби

ВАЗИЯТЛИ МАСАЛА:

Хонадоннинг кадастр қиймати 96 млн. сўм, умумий майдони 190 кв.метр

ЕЧИМИ:

Мол-мулк солиги суммаси : 96 000 000 x 0,28 % = 268 800 сўм.

Умумий майдони 200 кв.метрдан ортиқ бўлган туар жойлар учун мол-мулк солигини ҳисоблаш тартиби

ВАЗИЯТЛИ МАСАЛА:

Вилоятдаги туманда жойлашган хонадоннинг кадастр қиймати 154 млн. сўм, майдони 240 кв. метр.

ЕЧИМИ:

*Мол-мулк солиги суммаси: 154 000 000 *0,37% = 569800 сўм.*

Шаҳарларда жойлашган умумий майдони 200 кв.метрдан 500 кв.метргача бўлган туар жойлар учун мол-мулк солигини ҳисоблаш тартиби

ВАЗИЯТЛИ МАСАЛА:

Шаҳардаги хонадоннинг кадастр қиймати 180 млн. сўм, мулк майдони эса 310 кв.м.

ЕЧИМИ:

*- Солик суммаси: 180 000 000 *0,37% = 666 000 сўм.*

Шаҳарларда жойлашган умумий майдони 500 кв.метрдан ортиқ бўлган туар жойлар учун мол-мулк солигини ҳисоблаш тартиби

ВАЗИЯТЛИ МАСАЛА:

Шаҳардаги хонадоннинг кадастр қиймати 300 млн. сўм, мулк майдони 540 кв. м.

ЕЧИМИ:

*-Солик суммаси: 300 000 000 *0,49% = 1 470 000 сўм.*

Тадбиркорлик фаолияти ёхуд тадбиркорларга ижарага беришда фойдаланиладиган солик солиш обьектлари, шунингдек тадбиркорлик фаолияти ва (ёки) даромад олиш учун мўлжалланган нотурар кўчмас мулк обьектлари учун мол-мулк солигини ҳисоблаш тартиби

ВАЗИЯТЛИ МАСАЛА:

Сирдарё вилояти Гулистан шаҳри Нурафшин МФЙда жойлашган жисмоний шахсга тегишили савдо дўйконининг кадастр қиймати 120 млн.сўмни, умумий майдони 40 кв. метрни ташкил этади.

ЕЧИМИ:

-Нотурар жойининг кадастр қиймати: 120 000 000 сўм.

-Мол-мулк солиги ставкаси -1,5 %.

*- Солик суммаси:120 000 000 * 1,5 % =1 800 000 сўм.*

Норматив муддатларда қурилиши тугалланмаган яшаш учун мўлжалланмаган объектларга нисбатан мол-мулк солигини ҳисоблаш тартиби

ВАЗИЯТЛИ МАСАЛА:

Фарғона вилояти Фарғона шаҳрида жисмоний шахснинг яшаши учун мўлжасланмаган обьекти (масалан меҳмонхонаси) ушибу обьектни қуришига доир лойиҳа-смета ҳужжатларида белгиланган норматив муддатда (2023 йил 1 январга қадар) қурилиши тугалланмаган.

ЕЧИМИ:

- Норматив муддатда қурилиши тугалланмаган яшаши учун мўлжасланмаган обьектларга нисбатан **солиқ ставкаси- 3 фоиз**.
- Кўчмас мулкнинг шартли баҳоси вилоят марказлари учун 42 млн^{*5} =**210 млн**
- Солиқ суммаси: $210\ 000\ 000 * 3 \% = \text{6 300 000 сўм}$.

Бир неча мулқдорларининг умумий улушли мулки бўлган иморатлар, бинолар ва иншоотлар учун солиқ ҳар бир мулқдор томонидан уларнинг ушбу иморатлар, бинолар ва иншоотлардаги улушкига мутаносиб равишда тўланади.

Мол-мулқка бўлган мулк ҳуқуқи календарь йил мобайнида бир мулқдордан бошқасига ўтган тақдирда, солиқ аввалги мулқдор томонидан шу йилнинг 1 январидан эътиборан у мол-мулқка бўлган мулк ҳуқуқини йўқотган ойнинг бошланишига қадар, янги мулқдор томонидан эса, унда мулк ҳуқуқи вужудга келган ойдан эътиборан тўланади.

ВАЗИЯТЛИ МАСАЛА:

Фуқаро Ф. Раҳмонов ўзига тегишили бўлган умумий майдони 190 кв.метр, кадастр қиймати 85 млн. сўм бўлган турар жойини 2023 йил 21 февраль куни фуқаро С. Кенжасевга сотган.

Ушибу мулк бўйича аввалги ва янги мулк эгалари томонидан тўланадиган солиқ суммасини топиш керак?

ЕЧИМИ:

Ушбу кўчмас мулк бўйича йиллик мол-мулқ солиғи суммаси: 85 000 000 *0,28%=**238 000 сўм**

*Мулкнинг аввалги эгаси фуқаро Ф. Раҳмонов 1 ой (2023 йил январь учун) мулк солиги тўлайди: $238\ 000 / 12 * 1 = \text{19 833 сўм}$*

*Мулкнинг янги эгаси фуқаро С. Кенжасев 11 ой учун (февраль-декабрь) мулк солиги тўлайди: $238\ 000 / 12 * 11 = \text{218 166 сўм}$*

Янги иморатлар, бинолар ва иншоотлар бўйича солиқ мулк ҳуқуқи юзага келган ойдан эътиборан тўланади.

ВАЗИЯТЛИ МАСАЛА:

Фуқаро А. Сафаров янги қурган уйини 2023 йил ноябрь ойида давлат рўйхатидан ўтказди ва унда ушибу уй бўйича мулк ҳуқуқи ушибу ойда юзага

келди. Мулкнинг кадастр қиймати 60 млн. сўм. Умумий майдони 160 кв. метр.

Ушибу мулк бўйича A. Сафаров томонидан тўланадиган солик суммасини топиш керак?

ЕЧИМИ:

Ушбу қўчмас мулк бўйича йиллик мол-мулк солиги суммаси: 60 000 000 *0,28%=**168 000 сўм**

Фуқаро A. Сафаров 2 ой (2023 йил ноябрь-декабрь учун) мулк солиги тўлайди: **168 000 /12*2= 28 000 сўм**

Мерос бўйича ўтган мол-мулк учун солик меросхўрда мулк ҳуқуки вужудга келган ойдан эътиборан тўланади.

ВАЗИЯТЛИ МАСАЛА:

Фуқаро Р. Шодмоновга 2023 йил август ойида умумий майдони 170 кв.метр, кадастр қиймати 64 млн. сўм бўлган турар жойга (отасидан мерос қолган) нисбатан мерос ҳуқуки юзага келди.

Ушибу мулк бўйича Р. Шодмонов томонидан тўланадиган солик суммасини топиш керак?

ЕЧИМИ:

Ушбу қўчмас мулк бўйича йиллик мол-мулк солиги суммаси: 64 000 000 *0,28%=**179 200 сўм**

Фуқаро Р. Шодмонов 5 ой (2023 йил август-декабрь учун) мулк солиги тўлайди: **179 200 /12*5= 74 667 сўм**

Изоҳ: отасининг қарзи ҳам меросхўрдан ундирилади.

Солик солиш обьекти йўқ қилинган, вайрон бўлган ёки бузиб ташланган тақдирда, солиқни ундириш мол-мулк йўқ қилинган, вайрон бўлган ёки бузиб ташланган ойдан эътиборан тугатилади. Солик суммасини қайта ҳисоб-китоб қилиш маҳаллий давлат ҳокимияти органи ёки фуқароларнинг ўзини ўзи бошқариш органи томонидан берилган йўқ қилинганлик, вайрон бўлганлик ёки бузиб ташланганлик фактини тасдиқловчи хужжатлар мавжуд бўлган тақдирда, амалга оширилади.

ВАЗИЯТЛИ МАСАЛА:

Фуқаро М. Эгамбердиевнинг уйи ҳоким қарорига асосан марказий кўчаларни кенгайтириши мақсадида 2023 йил июль ойида бузиб ташланди. Мазкур уйнинг кадастр қиймати 60 млн. сўм. Умумий майдони 170 кв. метр.

Ушибу бузилган мулк бўйича М. Эгамбердиев томонидан тўланадиган солик суммасини топиш керак?

ЕЧИМИ:

Ушбу қўчмас мулк бўйича йиллик мол-мулк солиги суммаси: 60 000 000 *0,28%=**168 000 сўм**

Фуқаро М. Эгамбердиев уй бузулгунга қадар 6 ой (2023 йил январь-июнь учун) мулк солиги тўлайди: **168 000 /12*6= 84 000 сўм**

Календарь йил мобайнида имтиёзларга бўлган ҳуқуқ вужудга келган (тугаган) тақдирда, солиқни қайта ҳисоб-китоб қилиш ушбу ҳуқуқ вужудга келган (тугаган) ойдан эътиборан амалга оширилади.

ВАЗИЯТЛИ МАСАЛА:

Фуқаро Ш. Панжиеев 2023 йил февраль ойидага пенсияга чиққан. Унинг квартираси умумий майдони 40 кв.метр, кадастр қиймати 44 млн. сўм. Ушбу пенсионерга қачондан имтиёз қўлланилади ва қанча миқдорда солиқ тўлайди?

ЕЧИМИ:

Ушбу кўчмас мулк бўйича йиллик мол-мулк солиги суммаси: 44 000 000 *0,28%=**123 200 сўм**

Имтиёз февраль ойидан қўлланилади (мулк солигидан озод қилинади).

*Фуқаро Ш. Панжиеев 1 ой (2023 йил январь учун) мулк солиги тўлайди: 123200 /12*1= **10267 сўм***

Солиқни тўлаш тўғрисидаги тўлов хабарномаси солиқ органлари томонидан солиқ тўловчиларга имзо қўйдирилган ҳолда ёки тўлов хабарномаси олингандигини ва олинган санани тасдиқловчи бошқа усулда ҳар йили 1 мартдан кечиктирмай топширилади.

Солиқ даври учун солиқни тўлаш teng улушларда 15 апрелга ва 15 октябрга қадар амалга оширилади.

2. Жисмоний шахслардан олинадиган ер солиги

2.1. Ер солиги тўловчи жисмоний шахслар, солиқ объекти ва солиқ базаси

Ўзбекистон Республикасида Солиқ кодексининг 433-моддасига асосан мулк ҳуқуқи, эгалик қилиш, фойдаланиш ёки ижара ҳуқуқлари асосида ер участкаларига эга бўлган жисмоний шахслар, шунингдек юридик шахс ташкил этган ёки этмаган ҳолдаги дехқон хўжаликлари жисмоний шахслардан олинадиган ер солигини солиқ тўловчилари деб эътироф этилади.

Туман (шаҳар) ҳокими билан тузилган ер участкасининг ижара шартномаси асосида берилган ер участкалари учун тўланадиган ижара тўлови ер солигига тенглаштирилади. Ер участкаларини ижарага олган жисмоний шахсларга нисбатан жисмоний шахслардан олинадиган ер солигини тўловчилар учун белгиланган солиқ ставкалари, солиқ имтиёzlари, солиқни ҳисоблаб чиқариш ва тўлаш тартиби татбиқ этилади.

Уй-жой, яшаш учун мўлжалланмаган иморатлар ва иншоотлар мерос бўйича ўтиши билан биргаликда мулк ҳуқуқи, эгалик қилиш ва фойдаланиш ҳуқуқи ўтган ер участкалари учун ер солиги мерос қолдирувчининг солиқ мажбуриятларини инобатга олган ҳолда меросхўрлардан ундирилади.

Куйидаги ер участкалари жисмоний шахслардан олинадиган ер солигининг солиқ солиши объектидир:

1) жисмоний шахсларга қишлоқ хўжалиги мақсадлари учун, шунингдек дехқон хўжалигини юритиш учун белгиланган тартибда берилган ер участкалари;

2) якка тартибда уй-жой қурилиши учун белгиланган тартибда берилган ер участкалари;

3) жамоа боғдорчилиги, узумчилиги ва полизчилигини юритиш учун берилган, шунингдек якка тартибдаги ва жамоа гаражлари эгаллаган ер участкалари;

4) хизмат юзасидан берилган чек ерлар;

5) мерос бўйича, ҳадя қилиниши ёки сотиб олиниши натижасида уй-жой ва иморатлар билан биргаликда мулк хуқуки, эгалик қилиш ва фойдаланиш хуқуки ҳам ўтган ер участкалари;

6) қонунчиликда белгиланган тартибда мулк қилиб сотиб олинган ер участкалари;

7) тадбиркорлик фаолиятини юритиш учун фойдаланишга ёки ижарага берилган ер участкалари.

Кўп квартирали уйлар эгаллаган ер участкалари солиқ солиш обьекти бўлмайди, бундан тадбиркорлик фаолиятини юритиш учун фойдаланишга ёки ижарага берилган ер участкалари ва кўп квартирали уйларда жойлашган яшаш учун мўлжалланмаган кўчмас мулк обьектлари мустасно.

Кўчмас мулкка бўлган хукуқларни давлат рўйхатидан ўtkазишни амалга оширувчи органнинг маълумотлари бўйича ер участкаларининг майдони солиқ базасидир.

Жисмоний шахсларга берилган, шунингдек дехқон хўжалигини юритиш учун берилган қишлоқ хўжалигига мўлжалланган ерлар бўйича солиқ базаси Солиқ кодекси 428-моддасининг **иккинчи қисмига** мувофиқ солиқ солинмайдиган қишлоқ хўжалигига мўлжалланган ер участкалари чегириб ташланган ҳолда, ер участкаларининг қонунчиликка мувофиқ аниқланган **норматив қийматидир**. Бунда ер участкаларининг норматив қиймати тегишинча туманнинг (шаҳарнинг) суғориладиган ёки суғорилмайдиган ерлари учун ўртача ҳисобда аниқланади.

Жамоа боғдорчилиги, узумчилиги ва полизчилигини юритиш учун фуқароларга берилган, шунингдек якка тартибдаги ва жамоа гаражлари эгаллаган ер участкалари бўйича солиқ базаси ушбу ер участкаларини берган ташкилотлар бошқарув органларининг маълумотлари бўйича аниқланади.

Хизмат юзасидан берилган чек ер майдонлари бўйича солиқ базаси ўз ходимларига ер участкаларини берган корхоналар, муассасалар ва ташкилотларнинг маълумотлари бўйича аниқланади.

2.2. Ер солиги ставкалари, солиқ ставкаларини аниқ миқдорларини белгилаш ҳамда ер солиги бўйича имтиёзларни қўллаш хусусиятлари

Ўзбекистон Республикаси ҳудудлари кесимида базавий солиқ ставкалари 1 кв. м учун мутлақ ўлчамда қуйидаги миқдорларда белгиланади (бундан жисмоний шахсларга берилган, шунингдек дехқон хўжалигини юритиш учун берилган қишлоқ хўжалигига мўлжалланган ер участкалари мустасно): Солиқ кодекси. 437-модда.

Республика ҳудудлари	1 кв.м учун базавий солиқ ставкаси (сўмда)
Тошкент шаҳри	

1 зона	1408
2 зона	1194
3 зона	979
4 зона	770
5 зона	550
Қорақалпоғистон Республикаси	286
Андижон вилояти	352
Бухоро вилояти	286
Жиззах вилояти	286
Қашқадарё вилояти	286
Навоий вилояти	286
Наманган вилояти	352
Самарқанд вилояти	352
Сурхондарё вилояти	268
Сирдарё вилояти	226
Тошкент вилояти	297
Фарғона вилояти	297
Хоразм вилояти	286

Солиқ ставкаларини аниқ микдори қуидаги тартибда белгиланади:

Қорақалпоғистон Республикаси Жўқорғи Кенгеси ва вилоятлар халқ депутатлари Кенгашлари 0,5 дан 2,0 гача бўлган камайтирувчи ва оширувчи коэффициентларни қўллаган ҳолда, юқорида белгиланган базавий солиқ ставкалари асосида қишлоқ хўжалигига мўлжалланмаган ерлар учун туман ва шаҳарлар кесимида уларнинг иқтисодий ривожланишига қараб, солиқ ставкаларини белгилайди.

Туманлар ва шаҳарлар халқ депутатлари Кенгашлари эса Қорақалпоғистон Республикаси Жўқорғи Кенгеси ва вилоятлар халқ депутатлари Кенгашлари томонидан белгиланган солиқ ставкаларига 0,7 дан 3,0 гача бўлган камайтирувчи ва оширувчи коэффициентларни уларнинг худудларида жойлашган дача, массив, маҳалла, кўча кесимида киритади. Яъни туман (шаҳар)лар маҳалла фуқаролари йиғинлари кесимида якка тартибда уй-жой қуришга бериладиган ерлар учун жисмоний шахслардан олинадиган ер солигининг аниқ ставкаларини белгилайди.

Жисмоний шахсларга якка тартибдаги турар жой қуриш ва ободонлаштиришга берилган томорқа ер участкаларига якка тартибдаги уй-жой қуришга берилган ер участкалари учун белгиланган ставка қўлланилади.

Тошкент шаҳри туманлари халқ депутатлари Кенгашлари эса тўғридан-тўғри Солиқ кодексида белгиланган якка тартибда уй-жой қуришга бериладиган ерлар учун жисмоний шахслардан олинадиган ер солигининг базавий солиқ ставкаларига нисбатан 0,7 дан 3,0 гача бўлган камайтирувчи ва оширувчи коэффициентларни қўллаган ҳолда маҳалла фуқаролар йиғинлари кесимида аниқ ставкаларни белгилаб беради.

Масалан: Тошкент шаҳри Учтепа тумани Богобод МФЙ 4-зона ҳисобланади. Ушибу маҳалла учун базавий солиқ ставкасига 1,11 оширувчи коэффициент қўлланилган.

*Натижада ер солиги ставкаси 847 сўм (770*1,11) этиб белгиланган*

Туманлар ва шаҳарлар халқ депутатлари Кенгашлари томонидан кейинги солиқ даври учун солиқ ставкалари ҳар йили жорий солиқ даврининг 31 декабрига қадар қишлоқ хўжалигига мўлжалланмаган ер участкалари жойлашган жойдаги солиқ органларига тақдим этади.

Ўзбекистон Республикаси Солиқ кодексининг 480¹-моддасида маҳсус солиқ ставкалари қўлланилишини назарда тутувчи солиқ солишининг алоҳида тартиби қўлланиладиган Ўзбекистон Республикасининг алоҳида ҳудудлари: Фарғона вилоятининг -Сўх тумани; - Риштон туманининг Чўнгара маҳалласи; Фарғона туманининг Шоҳимардон, Ёрдон маҳаллалари ва Ҳосилот маҳалласининг Тоштепа - 2 кўчаси ҳудудларида жойлашган кўчмас мулк обьектларига Солиқ кодексининг 437-моддасида белгиланган ер солиги ставкаларига 0,1 коэффициент қўлланилади.

Жисмоний шахсларга берилган, шунингдек дехқон хўжалигини юритиш учун берилган қишлоқ хўжалигига мўлжалланган ерларга солиқ ставкаси қишлоқ хўжалиги экинзорларининг норматив қийматига нисбатан 0,95 фоиз миқдорда белгиланади. Бунда қишлоқ хўжалиги ерларининг сифати ёмонлашгандა ёки яхшиланганда (балл бонитети пасайганда ёки ошганда) қишлоқ хўжалигига мўлжалланган ерларга эга бўлган дехқон хўжаликларига ва жисмоний шахсларга нисбатан Солиқ кодекси 429-моддасининг тўққизинчи ва ўнинчи қисмларида назарда тутилган тартиб татбиқ этилади.

Ўзбекистон Республикасида Солиқ кодексининг 436-моддасига асосан соликдан қўйидагилар озод қилинади:

1) «Ўзбекистон Қаҳрамони», Совет Иттифоқи Қаҳрамони, Меҳнат Қаҳрамони унвонларига сазовор бўлган, учала даражадаги Шуҳрат ордени билан тақдирланган фуқаролар. Мазкур имтиёз «Ўзбекистон Қаҳрамони» унвони берилганлиги тўғрисидаги гувоҳнома, Совет Иттифоқи Қаҳрамони ва Меҳнат Қаҳрамони дафтарчалари, орден дафтарчаси ёки мудофаа ишлари бўлимининг маълумотномаси асосида берилади;

2) уруш ногиронлари ва қатнашчилари, шунингдек доираси қонунчилик билан белгиланадиган, уларга тенглаштирилган шахслар. Ушбу имтиёз уруш ногиронининг (қатнашчисининг) тегишли гувоҳномаси ёки мудофаа ишлари бўйича бўлимнинг ёхуд бошқа ваколатли органнинг маълумотномаси асосида, ногиронлиги бўлган бошқа шахсларга (қатнашчиларга) ногиронлиги бўлган шахснинг (қатнашчининг) имтиёзларга бўлган хукуқи тўғрисидаги гувоҳномаси асосида берилади;

3) I ва II гуруҳ ногиронлиги бўлган шахслар. Мазкур имтиёз пенсия гувоҳномаси ёки тиббий-ижтимоий эксперт комиссиясининг маълумотномаси асосида берилади;

4) ёлғиз пенсионерлар. Ёлғиз ёки вояга етмаган болалари билан ёхуд ногиронлиги бўлган боласи билан бирга алоҳида уйда яшовчи пенсионерлар ёлғиз пенсионерлар деб тушунилади. Мазкур имтиёз пенсия гувоҳномаси ёки Ўзбекистон Республикаси Молия вазирлиги ҳузуридаги бюджетдан ташқари Пенсия жамғармаси туман (шаҳар) бўлимининг маълумотномаси, шунингдек фуқаролар ўзини ўзи бошқариш органларининг маълумотномаси асосида берилади;

5) боқувчисини йўқотган кўп болали оилалар. Ота ва онадан бири ёхуд ота-она вафот этган кўп болали оилалар солик солиш мақсадида боқувчисини йўқотган кўп болали оилалардир. Ушбу имтиёз Ўзбекистон Республикаси Молия вазирлиги хузуридаги бюджетдан ташқари Пенсия жамғармаси туман (шаҳар) бўлимининг маълумотномаси асосида берилади;

6) Чернобиль АЭСдаги авария оқибатларини тугатишида иштирок этганлик учун имтиёзлар оладиган фуқаролар (шу жумладан вақтинча юборилган ёки хизмат сафарига юборилган) фуқаролар. Мазкур имтиёз тиббий-мехнат эксперт комиссиясининг маълумотномаси, ногиронлиги бўлган шахснинг махсус гувоҳномаси, Чернобиль АЭСдаги авария оқибатларини тугатиши иштирокчисининг гувоҳномаси, шунингдек ваколатли органлар томонидан берилган ва имтиёзлар бериш учун асос бўладиган бошқа хужжатлар асосида берилади;

7) энергия ресурсларининг амалдаги тармоқларидан тўлиқ узиб қўйилган турар жойларда қайта тикланадиган энергия манбаларидан фойдаланувчи шахслар - қайта тикланадиган энергия манбалари ўрнатилган ойдан эътиборан уч йил муддатга. Мазкур имтиёз энергия ресурсларининг амалдаги тармоқларидан тўлиқ узиб қўйилган ҳолда қайта тикланадиган энергия манбаларидан фойдаланиш тўғрисида энергия таъминоти ташкилотлари томонидан берилган маълумотнома асосида берилади.

Юқорида белгиланган имтиёзлари, бундан боқувчисини йўқотган кўп болали оилалар мустасно, якка тартибдаги уй-жой қурилиши, дехқон хўжалигини юритиш учун берилган ер участкаларига бўлган хуқуқларни давлат рўйхатидан ўтказиши амалга оширувчи органда рўйхатдан ўтказган жисмоний шахсларга берилади. Бунда мазкур солик имтиёзлари солик тўловчининг танлови бўйича факат битта ер участкасига берилиши мумкин, бундан қайта тикланадиган энергия манбаларидан фойдаланувчи шахслар мустасно.

2023 ЙИЛ 16 ФЕВРАЛДАГИ ПҚ-57-СОН ҚАРОРИ БИЛАН:

2023 йил 1 апрелдан бошлаб умумий қуввати 100 кВтгача бўлган қайта тикланувчи энергия манбалари қурилмаларини ўрнатган жисмоний шахслар ушбу қурилмалар билан банд бўлган участкалар бўйича ер солигини тўлашдан улар фойдаланишига топширилган пайтдан эътиборан уч **йил муддатга**, ўрнатилаётган қуёш панелларининг қувватига нисбатан 25 фоиздан кам бўлмаган қувватга эга электр энергиясини сақлаш тизими билан ўрнатилган бўлса — **йун йил муддатга** озод этилади.

Жисмоний шахслардан олинадиган ер солиғи бўйича солик имтиёзларига эга бўлган шахслар солик имтиёзларини олиш хуқуқини тасдиқловчи хужжатларини ер участкаси жойлашган ердаги солик органларига мустақил равишда тақдим этади.

2.3. Жисмоний шахслар учун ер солиғини ҳисоблаб чиқариш ва бюджетга тўлашнинг ўзига хос жихатлари

Солиқни ҳисоблаб чиқариш ер участкаси жойлашган ердаги солиқ органлари томонидан күчмас мулкка бўлган ҳуқуқларни давлат рўйхатидан ўтказувчи органнинг маълумотлари асосида, жисмоний шахсларга берилган, шунингдек деҳқон хўжалигини юритиш учун берилган қишлоқ хўжалигига мўлжалланган ерлар бўйича эса қишлоқ хўжалиги экинзорларининг норматив қийматини аниқловчи органнинг маълумотларига асосан, Солиқ кодексининг 435-моддаси иккинчи қисмида назарда тутилган тартибга мувофиқ амалга оширилади.

ВАЗИЯТЛИ МАСАЛА:

Қашқадарё вилояти Қарши тумани Чарогил МФЙда турар жой ер майдони б сотих (600 кв. метр).

Ер солигини ҳисоблаш зарур.

ЕЧИМИ:

*Қашқадар вилоятида 1 кв. метр ер учун базавий ставка 286,0 сўм. Қарши тумани учун вилоят халқ депутатлари Кенгаши 0,8 коэффициентни қўллаган. Қарши тумани Чарогил МФЙ учун солиқ ставкасига 0,83 пасайтирувчи коэффициент қўлланилган. Натижада ер солиги ставкаси 190 сўм этиб белгиланган. **190 сўм=(228,8*0,83 коэф)**.*

*Шунга кўра уибу фуқарога 2023 йилда қуийдаги миқдорда ер солиги ҳисобланади: 600 *190=114 000 сўм*

Тадбиркорлик фаолиятида фойдаланилдиган ер участкалари учун ёхуд уйлар, дала ҳовли иморатлари, якка тартиbdаги гаражлар ва бошқа иморатлар, иншоотлар юридик шахсга ёки якка тартиbdаги тадбиркорга ижарага берилганда, шунингдек жисмоний шахсларнинг мулкида бўлган, яшаш учун мўлжалланмаган кўчмас мулк обьектлари эгаллаган ер участкалари учун солиқ жисмоний шахслардан юридик шахслардан олинадиган ер солигини тўлаш учун белгиланган солиқ ставкалари бўйича ундирилади ҳамда Солиқ кодексининг 436-моддасида кўрсатилган имтиёзлар уларга нисбатан татбиқ этилмайди.

ВАЗИЯТЛИ МАСАЛА:

Қашқадарё вилояти Қарши шаҳар Амир Темур МФЙда фуқарога турғун савдо шахобчасини қуриш учун 0,01 гектар (100 кв.метр) ер ажратилган.

Ер участкаси учун 2023 йилда қанча миқдорда ер солиги ҳисобланишини топиш лозим?

ЕЧИМИ:

№	Мажалла номи	2022 йилда Қашқадарё вилоятида юридик шахслар учун солиқ ставкаси 1 гектар учун (млн. сўм)	2022 йилда Қарши шаҳрида юридик шахслар учун вилоят тасдиқлаган ставкаси 1 гектар учун (млн. сўм)	Туман Кенгаши коэффициент	2022 йил учун ер солиги ставкаси 1 гектар учун (млн. сўм)
1.	А.Темур МФЙ	29,0	35,2	0,99	35,09

Қарши шаҳар Амир Темур МФЙда юридик шахслар учун ер солиғи ставкаси 1 гектар ер учун 35 090 минг сүм.

Фуқарога берилган ер участкаси 0,01 гектар.

Ер солиғи суммаси: 0,01 га*35 090 000 сүм=350 900 сүм

Жисмоний шахс ёки оиласый корхона ер участкасидан унда жойлашган уйда истиқомат қилиш билан бир вақтда товарлар ишлаб чиқариш (хизматлар күрсатиши) учун фойдаланган тақдирда, солиқ жисмоний шахслар учун белгиланган солиқ ставкаси бўйича тўланади.

Якка тартибда уй-жой қуриш ва тураг жойни ободонлаштириш учун берилган ер участкаларининг томорқа қисмига қишлоқ хўжалиги экинларини экиш ёки уни ободонлаштириш амалга оширилмаган тақдирда солиқ уч баравар миқдорда тўланади.

Ер участкаларидан хужжатларсиз ёхуд ер участкасига бўлган хуқуқни тасдиқловчи хужжатларда кўрсатилганидан каттароқ ҳажмда фойдаланилганда, солиқ ставкаси белгиланган солиқ ставкаларининг уч баравари миқдорида белгиланади. (*Мазкур норма Президентимиз ташаббуси билан бекор қилинини назарда тутимлоқда.*)

Солиқ органлари ҳар йили 1 мартдан кечиктирмай солиқ суммаси ва уни тўлаш муддатлари кўрсатилган тўлов хабарномасини жисмоний шахсларга имзо қўйдирив ёки тўлов хабарномаси олинганлиги фактини ва олинган санани тасдиқловчи бошқа усуlda топширади.

Йил мобайнида ер участкаси майдони ўзгарганда ва имтиёзларга бўлган хуқуқ юзага келганда (тугатилганда) солиқ органлари мазкур ўзгаришлардан кейин бир ой ичидаги солиқни қайта ҳисоб-китоб қилиши ҳамда солиқ тўловчига солиқ суммаси ва уни тўлаш муддатлари кўрсатилган янги ёки қўшимча тўлов хабарномасини тақдим этиши керак.

Кўп квартирали уйларда жойлашган тураг жой бўлмаган кўчмас мулк обьектлари билан банд бўлган ер участкалари бўйича солиқ тураг жой бўлмаган кўчмас мулк обьектининг қаватлар сонига бўлинган майдонидан келиб чиқсан ҳолда ҳисобланади.

ВАЗИЯТЛИ МАСАЛА:

Тошкент шаҳри Учтепа тумани Богистон МФЙда жойлашган 4 қаватли тураг жойининг 1-қаватида жисмоний шахсга тегишили 100 кв.метрлик нотурар жой мавжуд.

2023 йилда мазкур нотурар жой ер майдони бўйича тўланиши лозим бўлган ер солиғи қандай ҳисобланади?

ЕЧИМИ:

№	Маҳалла номи	2023 йилда Тошкент шаҳри 4-зонасида юридик шахслар учун тасдиқлаган ставка 1 гектар учун (млн. сүм)	Туман Кенгаши коэффициенти (0,7 дан 3 гача)	2022 йилда 1 гектар учун ер солиғи ставкаси (млн. сүм)
6.	Богистон МФЙ	99,0	1,15	113,85

Нотурар жой майдони қаватлар сонига бўлинади: 100/4=25 кв.метр.

Ер солиги юридик шахслар учун белгиланган ставкалари бүйича ундирилади. 1 кв.метр ер учун солиқ ставкасы: 113 085 000/10000 метр (1 га)=11 308 сүм.

*Ер солиги суммасини ҳисоблаймиз: 25 кв.метр*11 308 сүм=282 700 сүм*

Йил давомида ажратилган ер участкалари учун солиқ ер участкаси ажратилган ойдан кейинги ойдан эътиборан жисмоний шахслар томонидан тўланади.

ВАЗИЯТЛИ МАСАЛА:

Фуқаро Р. Расуловга 2023 йил 16 март куни уй-жой қуриши учун ер участкаси ажратилган.

Ер бўйича йиллик (12 ойлик) ҳисобланадиган солиқ суммаси -40 минг сўм бўлса

ТОПИШ КЕРАК:

P. Расулов томонидан тўланадиган ер солиги суммаси?

ЕЧИМИ:

Йил давомида ажратилган ер участкалари учун солиқ ер участкаси ажратилган ойдан кейинги ойдан эътиборан тўланади. СК.440-модда

*Ф. Раҳмонов 9 ой (апрель-декабрь) учун 240 000 /12*9= 180 000 сўм ер солиги тўлайди.*

Ер участкаси майдони камайтирилган тақдирда, солиқни тўлаш ер участкаси камайтирилган ойдан эътиборан тугатилади (камайтирилади).

ВАЗИЯТЛИ МАСАЛА:

Тошлиқ туманида М. Эгамбердиев ҳовлиси ер майдонининг 1/4 қисми ҳоким қарорига асосан марказий кўчаларни кенгайтиши мақсадида 2023 йил июль ойида олиб қўйилди.

Йиллик ҳисобланган ер солиги суммаси -360 минг сўм

ТОПИШ КЕРАК:

Ер участкаси камайтирилгани учун қанча миқдорда ер солиги тўланади?

ЕЧИМИ:

Ер участкаси майдони камайтирилган тақдирда, солиқни тўлаш ер участкаси камайтирилган ойдан эътиборан тугатилади (камайтирилади). СК.440-модда

*М. Эгамбердиев дастлабки 6 ой (январь-июнь) учун 360 000/12*6=180 000 сўм*

*Кейинги 6 ой (июль-декабрь) учун (180 000/4*3)=135 000 сўм*

180 000+135 000=215 000 сўм ер солиги

Солиқ бўйича имтиёзлар белгиланган тақдирда, бу солиқ имтиёзга бўлган ҳукуқ юзага келган ойдан эътиборан тўланмайди. Солиқ бўйича имтиёзларга бўлган ҳукуқ тугатилган тақдирда, бу солиқ мазкур ҳукуқ тугатилган ойдан кейинги ойдан эътиборан тўлана бошлади.

ВАЗИЯТЛИ МАСАЛА:

Боғодод туманида С. Мамажоновага 2023 йил 15 сентябрда ТМЭК томонидан 1-гуруҳ ногиронлиги тўғрисида гувоҳнома берилган.

2023 йилда ҳисобланган ер солиги-240 минг сўм

ТОПИШ КЕРАК:

Имтиёз қачондан қўлланилади?

2023 йил учун қанча миқдорда ер солиги тўланади?

ЕЧИМИ:

Имтиёзлар белгиланган тақдирда, бу солик имтиёзга бўлган ҳуқуқ юзага келган ойдан эътиборан тўланмайди. СК-440-модда

Имтиёз сентябрь оидан қўлланилади (ер солигидан озод қилинади).

*С. Мамажонова 8 ой (январь-август) учун $240\ 000 / 12 * 8 = 160\ 000$ сўм ер солиги тўлайди*

ВАЗИЯТЛИ МАСАЛА:

Дангарга туманида фуқаро Р. Пардаевнинг 2-гуруҳ ногиронлиги 2022 йил май оидиа ТМЭК томонидан бекор қилинди.

Р. Пардаевга ҳисобланган йиллик ер солиги суммаси- 120 000 сўм.

ТОПИШ КЕРАК:

Имтиёз қачондан бекор қилинади?

Қанча миқдорда солик тўлайди?

ЕЧИМИ:

Имтиёз ҳуқуқи тугатилган тақдирда, солик ҳуқуқ тугатилган ойдан кейинги ойдан эътиборан тўланади. СК.440-модда.

Имтиёз июнь оидан бекор қилинади.

*Р. Пардаев 7 ой (июнь-декабрь) учун $120\ 000 / 12 * 7 = 70\ 000$ сўм ер солиги тўлайди.*

ВАЗИЯТЛИ МАСАЛА:

Қашқадарё вилояти Қарши шаҳар Геолог МФЙда яшовчи фуқаро хонадони ер участкаси майдони 6 сотих (600 кв. метр)ни ташкил этади. Ушбу хонадон эгаси 2023 йил 15 июнь куни ТМЭК томонидан 1-гуруҳ ногирони деб топилган ва унга ногиронлик гувоҳномаси тақдим этилган. Хонадон эгасига тегишили ногиронлик гувоҳномаси нусхаси 20 июнь куни имтиёздан фойдаланиши учун ДСИга тақдим этилган.

2023 йилда мазкур хонадон ер участкаси учун имтиёзни қўллаган ҳолда ер солиги қандай ҳисобланади?

№	Маҳалла номи	2023 йил учун Қашқадарё вилояти учун базавий ставка	2023 йил учун вилоят Кенгаши коэффициенти	Шаҳар Кенгаши коэффициенти	2023 йил учун ер солиги ставкаси
16.	Геолог МФЙ	286,0	286,0*1,10	1,14	357,5

ЕЧИМИ:

Қашқадарё вилояти Қарши шаҳар Геолог МФЙда ер солигининг ставкаси 1 кв.м учун 357,5 сўм

*Йиллик ер солиги йил бошида қуийдагича ҳисобланган: 600 кв.метр *357,5 сўм=214500 сўм*

СК. 440-моддасига асосан ер солиги бўйича имтиёзлар белгиланган тақдирда, бу солик имтиёзга бўлган ҳуқуқ юзага келган ойдан эътиборан тўланмайди.

*Шунга кўра мазкур фуқаро 2023 йил учун ҳисобланган солиқнинг 7 ойлик (7/12) қисмидан озод қилинади. Яъни: $214500/12*7=125\ 125$ сўм. Бюджетга 5 ойлик солиқ $214500 - 125125 = 89375$ сўм*

Солиқ даври учун солиқни тўлаш жисмоний шахслар томонидан 15 апрель ва 15 октябрга қадар teng улушларда амалга оширилади.

Ер участкалари ва мол-мулкни солиқقا тортишни янада такомиллаштириш, уларни баҳолаш ва ҳисобини юритишда замонавий усулларни жорий қилиш, ер ва сув ресурслари, ер қаъридан қазиб олинадиган фойдали қазилмалардан фойдаланиш самарадорлигини ошириш, шунингдек, маҳаллий давлат ҳокимияти органларининг мустақиллигини янада ошириш мақсадида Ўзбекистон Республикаси Президентининг 2020 йил 3 декабрдаги «Ресурс солиқлари ва мол-мулк солиғини янада такомиллаштириш тўғрисида»ги ПФ-6121-сонли Фармони билан мол-мулк ва ер солиқларини кўчмас мулк (бино, иншоот ва ер участкалари) обьектларининг бозор баҳосига яқин бўлган кадастр қиймати асосида ҳисоблаш тизимини босқичма-босқич жорий этиладиган бўлди.

Яъни, Фармонда белгиландики, кўчмас мулк обьектларининг бозор баҳосига яқин бўлган кадастр қиймати асосида мол-мулк ва ер солиқларини ҳисоблаш тизими икки босқичда жорий этилади:

биринчи босқичда (2021 - 2023 йиллар) - кўчмас мулк бўлган тураг-жой фонди обьектлари (квартира, якка тартибдаги уй-жойлар, дала-ҳовли), шунингдек, ушбу обьектлар эгаллаган ер участкаларига нисбатан;

иккинчи босқичда (2022 - 2024 йиллар) - яшаш учун мўлжалланмаган алоҳида кўчмас мулк обьектлари, шунингдек, ушбу обьектлар эгаллаган ер участкаларига нисбатан.